



# SchlössliTimes

Ussgob 24

August 2017

## S'Jubi-Johr het gstartet...

In dere Ussgob:

Geischerball Zufikon	1
Bärefels Termine Herbst	2
Aescher Fasnacht	3/4
Basler Fasnacht	5/6
Bummel	7
9mo entweder oder...	8

D' Fasnacht isch scho lang verbi, die „ärnschte“ Termin mit der Ussprochsitzig und dr Generalversammlig sind au dure, e paar Mitglieder sind gange oder pausiere und e paar neu sind drzue cho. Somit hämmer die alti Saison abgeschlosse und die neu isch scho mit de erschte Probe gstartet. Aber es isch nid nid eifach e neu Saison... nei, es isch d'Jubiläums-Saison!

### **20 Johr Schlössli Schränzer!**

In dere Ussgob luege mir nomol uff d'Fasnacht 2017 zruigg, erfahre wies uns am Bummel ergange isch und was sunscht no so gloffe isch. Au wärde mr chli füre luege, was alles in unserem spezielle Guggejohr astoht. Es wird sicher e speziells Johr gäh für uns Alli. Sigs für die wo scho sit em Afang oder fascht em Afang drbi sind, für die neue wo grad mit em Jubi-Joohr bi uns starte, oder au füre neu zämmegwürfleti Vorstand. Es git bestimmt e spannends und tolls Johr!

Mir freue uns druff!

**Immer ufem laufende uf:**

[www.schloessli-schraenzer.ch](http://www.schloessli-schraenzer.ch)

Matti-Babbe-Fischi


### **Geischerball – 24.02.2017**

Am Frittig vor dr Aescherfasnacht simmer s'einzig Mol in dr Vorfasnachtszit in Car gstiige. Umso meh hämmer uns gfreut. D'Fahrt isch zwar nur e Stund gange bis zu unserem Ziel im Aargau, aber wär uns kennt weis, dass das de Schlössli längt zum richtig guet in Stimmig z'cho ;-)

In Zufikon acho, hämmer zerscht mol gluegt wo mr do überhaupt uffträtte und wases alles so z'gseh git.

Mir hän e Labyrinth uns gäng zwüsche zwei Turnhalle vorgfunde, wo me sich durchus hätt chönne verlaufe. Beidi Halle sind scho guet mit Kostümierte Guggefründe bsuecht gsi.

D'Schlösslis händ sich ins Getümmel gstürzt, und s'einzig Guggefescht vo dere Fasnachtssaison gnosse. Beidi Halle sind gschmückt gsi und in Partylocations umfunktioniert worde. Gege Mitternacht hämmer denn unsere Ufftritt gha. Nachdäm mr am Mimösli immer die gliche 3 Lieder gspielt händ, isch unser Programm e bitzli abwäggsliigriicher gsi und mir hän vollgas gäh. Wie immer, wenn mr unterwägs sind. Sigs bim spiile oder au bim feschte. Zur spohter Stund hämmer denn alles wieder im Ahänger verstaut und sind richtig Aesch uffbroche. D'Fasnacht het chönne cho, mir sind bereit gsi!



Matti-Babbe-Fischi

## Waagetaufi Bärefels Waggis – 25.02.2017

Wie chönnts au anderscht sii... E Tag vor dr Aescher Fasnacht hämmer uns ufem übliche Parkplatz „z'Rynach-Süd“ troffe. Langsam wüsse mr jo wies goht. Jedes Johr trämme mr ufem Neuhof in Rynach uf Fründe! Nachere warme Begrüessi und eme Ständeli von unserer Site us, simmer gmüetlich zämme gsässe und sind mit Spiis und Trank verköschtigt worde. Nach dr Fasnacht 2016 hets jo e „Tuschgeschäft“ gäh, zwüsche de Schlössli-Schränzer und de Bärefels Waggis. Dr Germano wo sit Johre bi de Schlössli gsi isch het sie Schlagzüg gege dr Waage ituscht, und vo de Bärefels isch dr „Juniorwaggis“ Lori zu uns ans Schlagzüg gwäggslet. Ablösesumme sind miner Kentniss noch keini gflosse, höggschtens in flüssiger Form vielleicht ;-)

Wie jedes johr, taufe d'Bärefels Waggis d'Neuzuegäng vo de Schlössli-Schränzer. Das Johr hämmer dr Germano in die Taufi ibunde, will er jo vo de Schlössli zu de Bärefels gwäggslet het. Die Neue händ dr Text vom Rahmestückli „Citytourbus“, wo immer vor unserem Ufftritt am Mimösli dra gsi isch, ussghängigt becho gha. Und jetzt ischs an dr Zit gsi, dass sie das de awäsende Gäscht vorgführt händ. Sehr unterhaltsam isches gsi! und obwohl dr Germano das Stückli vo allne am wenigste kennt het (nämlich gar nid), het er sich do drbi Höggschtnote als Chauffeur vo däm Bus verdient. Dr Waage vo de Bärefels isch wie jedes johr mit viel Liebi baut worde. E grosses Wikinger Schiff händ sie das Johr ahnebaut. Au sie sind vom Uffträtt vo de Isländer an dr EM 2016 beidruckt gsi.

Spöter hämmer denn d'Insturmänt nomol füüregnoh und d'Gäsch mit unserem Guggesound verwöhnt. Wie jedes johr hämmer natürlich au das Johr nur für d'Bärefels s' Freedom gespiilt.

Vieli sind denn nochr Heime oder uff Rynach an d'Fasnacht gange, anderi händ no e Bierli oder e Schnaps gnoh, zum dr Wättergott für die näggschte 3 Täg gnädig zstimme. Das Opfer hämmer also gärn uff uns gnoh... und wie mr wüsse, hets gar nid so schlächt klappt ☺

Matti-Babbe-Fischi



## Schlössli-Schränzer Termine Herbst

26. August	Probesamschtig und Jubialass (Aktivi, Passivi + Ehemaligi)
23. September	Auftritt
21./22. Oktober	Probeweekend
1. November	öffentliche Prob
<b>11. November</b>	<b>Heimspiil</b>
18. November	Auftritt Extern
09. Dezember	Probesamschtig

## Aescher Fasnacht - 26.02. bis 28.02.2017

Wie allewyl hämmer uns am 12i bi dr reformierte Kirche in Aesch troffe. Fiinsüberlich useputzt und in vollem Glanz im neue Kostüm. D'Angi s'erschtmol vorus als Queen Elisabeth und dr Zug als Royal Guard wo d'Obrigkeit, unseri neu „Majöse“, jederzit beschützt. Dr Wättergott hets um e vielfalchs besser mit uns gmeint und d'Stimmig einiges ussglassener wie voreme Jahr. Mir hän uns em traditionelle Aperö mit de Passive und em Vortrab gwidmet, bevor mr denn in richtig Schuelhuusplatz uffbroche sind. Will mir das Jahr als Nummer 2 vom Umzug gstartet sind, isches echli hektischer wie au scho zue und här gange. Punkt 2 hets knallt und mir sind hinterem Bärefels-Wikinger-Schiff losgloffte. Dr Strosserand isch voll mit Lüt gsi, wo sich vom bunte Fasnachtstriibe het lo begeischtere. Unser neus Kostüm het, so im ganze, fantastisch usgseh.

Es isch immer wieder schön zgseh, wenn d'Lüt e freud an uns händ. Dr Umzug isch mit öbbe 40 Gruppierige im übliche Rahme gsi und Aesch het e super Fasnachtumzug dörfe erlabe. Wie immer isch dr Umzug ratzfatz umme gsi und mir hän dr Startnummere entprächend für eimol e längeri Pause gha bis es witer gange isch. Nachem obligate Ufftritt vorem Bärefels Waage im Dorf, inklusiv Aperö, simmer denn in d'Mühli go Znacht ässe. Leider isches die Fasnacht s'letschtmol gsi, wo mr uns vom alte Mühli-Team händ dörfe lo verwöhne. Aber au dasmol isches an 2 Öbe wieder vorzüglich gsi. Nachem Ässe hämmer wie gwohnt no dr eint oder ander Ufftritt uff dr Gass gha, händ s'eint oder andere Bierel, Lützli oder Wyyli gha, bevor denn am halb 12i unsere Stägeufftritt bi dr Mühli dr musikalisch Abschluss vom Sunntig bildet het. Instrumänt versorge und ab ins Schöpfli, hets ämel für die Meischte Schlössli gheisse!

Am Mäntig het sich e Teil scho dr Tradition entprächend bi Gigers in dr Wohnig troffe. D'Spuure vom Vortag het me de Gsichter chönne ablase... bi paarne chli weniger, bi paarne chli mehr ☺ Im grosse und ganze isches rächt ruhig zue und här gange. Eine isch bsunders bleich gsi im Gsicht... ob jetzt das nur am Alkoholkonsum vo de Vortäg gläge isch, oder ob d'Inhalation vom Rauch us der Rauchmaschine in dr Schöpfliar au usschlaggäbend gsi isch... me weises nid. Aber eins hämmer glernt... Wenn me muess chötze bi Gigers ufem Sitzplatz, nimmt me e durchsichtige Chübel... denn hän Alli bitz öbbis drvo! Danke Jeremy :-\*

Nachem Znacht isch dr berühmt berüchtigt Mäntig Obe agstande. Dr Fackelumzug het das Jahr stattgfunde und es sind sogar e paar lüt cho luege. Übers akündete Pingpong Konzärt ufem Mühliplatz verlieri nid viel wort. Aber wenn mes scho in dr Fasnachtszittig akündet, denn macht mes au aständig! Au wenn d'Zit vorem Obestreich chli knapp isch. Und au wenn dr Fackelumzug im 2016 sprichwörtlich em Wind und Wätter zum Opfer gfallte isch, me het 1 JOHR zit gha zum das z'plane... wenn me denn überhaupt was plane muess! Sunscht zum Mäntig Obe... was soll ich jetzt säge... Mir händs jo scho cheibe glatt gha untereinander, aber wenn me sich uff d'Hauptstrooss begäh het um die 10ni zobe, isch me sich fascht chli vorcho wie imene schlächte Spaghetti-Western... d'Stross isch leergfägt gsi. Het eigentlich nur no gfählt das irgend e ussdörte Wüeschtebusch quer über d'Stross zfliege cho isch.... 2018 wird besser! Ämmel sicher für die jublierende Schlössli-Schränzer ;-)

Am Zischtig Nomitag isch wie immer dr Kindermaskeball in Pfäffige agstande. Wo mr uns bereit gmacht händ vor dr Halle, het dr Petrus alli Schleuse geöffnet und unseri instrumänt amene Wassertescht unterzoge... bestande ;-). Nachem Ufftritt in dr Mehrzwäckhalle z'Pfäffige sind die übliche Verdächtige dr Stutz abgloffte, dr Brüelwäg durab bis zur Garage-Fasnachts-Beitz „Chez Päuli und Lea“. E Wahnsinn was mir dört wieder händ dörfe gniesse. E Znacht vo der Sonderklass und die eint oder ander Flasche Schnaps hämmer au no killt, MERCI VIELMOL... eimol meh!!!

Nachdäm im 2016 d' Schluuchete zum leidwäse vo de Organisatore schwer unterem Sturm glitte het, isches das Jahr zwar au immer wieder mol nass gsi, aber im grosse und ganze hets gfägt und es het, mit allne mitwirkende Guggene und Fasnachtsfründe e super Fasnachtsstimmig gherst! Gli isches denn so uff die 12i zuegange und mir händ s'letschtmol für das Jahr Stellig uff dr Mühlistäge bezoge. Vor rächt grossem Publikum hämmer unseri Lieder ahnegschmätteret und s'Ändi vo dr Fasnacht isch in grosse Schritt nöcher cho... Nachere churze Pause hämmer uns ufe Wäg zum Chircheplatz gmacht, wo unseri Fründe scho uf uns gwartet händ. Mir händ uns im Chreis um d'Bärefels Waggis und um d'Angi uffgestellt und unseri letschte 3 Stückli zum beschte gäh! Bim aschliessende Aperö mit de Bärefels hämmer dr aktivi Teil vo dere Fasnacht los usklinge.

E Tolle Fasnacht isch langsam aber sicher z'Änd gange. Schön ischs gsi! Bis näggscht Jahr.

Matti-Babbe-Fischi



# Impressionen Aescher Fasnacht 2017



## Basler Fasnacht 2017

Nachdäm mr jo scho in dr Vorfasnacht mit unserem Gastspiel am Mimösli, Teil vo dr Basler Fasnacht gsi sind, hämmer uns au das Johr am Fasnachts Zyschtig wieder uff Basels Gasse begäh. Träffpunkt isch bim Claraplatz gsi. Ein Schlössli nachem Andere isch itruudlet und me het sich nachere Wuche Fasnachtpause begrüesst und sich uff die bevorstehende Stunde gfreut. D'Angi het pfiiffe, oder sie hets eimol meh probiert... will das müemmer nochli üebe uff die neu Saison ahne ☺ Also simmer los maschiert und händ e erschtig Kostprob abgäh. Au wenn nur e churzi... Will mir sind uf diräktem Wäg ufe Kasärneplatz an d'Waage und Requisite Usstellig gloffe. Wie jetzt au scho sit e paar Jöhrli simmer zu de „Ammedysli“ ufe Ständeli verbi. Bi schönem Wätter hämmer dort d'Instrumänt deponiert und händ uns em Bier und dr Wurscht gwidmet. Nocher hämmer gneug, also wirklich meh wie gneug Zit gha zum d'Wääge ufem Platz azluege oder de Guggemuusige zlausche. S'Dumme... oder s'Guete an dene lange Pause isch, das me gneug Zit het zum e Bierli oder zwei zviel zue sich z'näh... aber was söll me au mache, wenn me dr eint oder ander ufeme Waage kennt wo eim ein ussgit. Ablehne wär jo unhöflich!

Denn simmer igstande und händ dr laaaangi wäg über die mittleri Brugg zum 3-König unter d'Zoggeli gnoh! Dort hämmer nämlich unsere näggschte Ufftritt gha. D'Fasnachtsbar isch voll gsi, und mir händ schwitzend und tropfend unseri Muusig zum beschte gäh. Nach unsere 3-4 Stückli wo mr gspiilt händ hets denn wieder gheisse istoh... oder doch nid? Vor dr Brugg? Nach dr Brugg? Lauft jetzt dä Stärnemarsch überhaupt scho? Würde mr öbber Störe? Wohl nid, aber mir watschle glich ohni z'spiile jede für sich über die Mittleri Brugg zrug und stöhn denn vorem Kaffi Spitz i. Ziel? Znachtässe im Volkshuus. Mir sind zwar sch'öbbe 4 Stund unterwägs gsi... aber wirklich witt simmer noni cho und eso viel gspiilt (vorallem uff dr Strooss) hämmer au noni. Das söll nid als Kritik verstande wärde, isch eifach e feststellig :-\*

Im Volkshuus hämmer denn schön separat für uns e sehr e feins Znacht übercho. Wases gäh het weisi jetzt grad nümme... aber dases sehr fein gsi isch, vorallem d'Suppe, das weisi no ☺ Mir händ wieder e grosszügigi Pause gha, do dr Stärnemarsch in vollem Gang gsi isch und mir uff dr Gasse grad eh nur „gstört“ hätte. D' Schlösslis händ sich im Glaibasel verteilt, sind ein go schnappe oder händ de Basler Gugge bim Stärnemarsch zuegluegt und zueglost. Dort hämmer au no dr Christian, e bsundere fan vo de Schlössli-Schränzer troffe. Mir händen denn grad mit Chappe, Schal und CD usgrüschtet. Mängmol bruchts so wenig...

Natürlich hämmer denn au im Hof vom Volkshuus no e Konzärtli gäh! Es tönt eifach guet in däm Innehof ☺ Larve uffsetze und istoh. Nachem Nomitag im Glaibasel het s'Grossbasel uff uns gwartet. Wieder ab über die Mittleri Brugg zum Storche Parking. Dort hämmer uff dr Stäge de Nuggi Spugger e ständeli brocht. Die händ nämlich Ihres 20-Jöhrig Jubiläum gfiirt in däm Johr. E Päusli und e Bierli spöter hämmer uns wieder ins Fasnachtsgetümmel gstürzt. Es isch halt scho löbbis anders z'Basel spielend durch die volle Gasse z'zieh. S'brätscht halt so richtig zwüsche de Hüüser. D'Stimmig isch richtig guet gsi und mir händs alli so richtig gnosse. Sigs bim spiile, in de Clique-Chäller oder eifach in de Gasse. Fascht schad das scho alles fascht wieder verbi isch. Wie jedes Johr gämmer z'Basel unser Abschluss-Ständeli uff dr grosse Stäge zur Balzbar uffe, hinde bim Steineparking. D'Angi het ihri Schöfli nomol zämmedrummlet und izellt, und denn hämmer nomol alles gäh und e schöne musikalische Abschluss vo dr Fasnacht 2017 gha.

Au wenn nid immer alles ganz eifach gsi isch in dere Saison, d'Angi im Herbscht als Majöse igsprunge isch (hesches super gmacht! :-\*) und mir mit em Mimösli ganz e anderi Vorfasnachtszit erläbt händ, isches wieder e super Schlössli Johr gsi! s' isch jo nonig ganz verbi gsi. Aber spötischstens in de früehe Morgestunde hämmer alli s'Kostüm und d'Larve versorgt und d'Fasnacht isch scho wieder verbi gsi. Aber mir hän jo no dr Bummel vor uns gha.

Matti-Babbe-Fischi



# Basler Fasnacht 2017






## Bummel 2017

Am 19. März 2017 isch es widder so wit gsi und mir hän uns zum alljährliche Bummelsunntig troffe. De einti chicer als de anderi natürlich. Es isch nit lang gange, bis allne klar gsi isch, was mer an dem warme Frühligstag wärde mache. Curling ischs grosse Thema gsi. Vo unserem Lokal us simmer denn losgloffe in Richtig Arlesheim. Natürlich hämmer an de steilschte Stell vo de Stross nach Arlesheim ufe dörfe s'Heimweh trällere (Danke nomol, Angi =D). Obe acho isch zerscht emol s'grosse Jacke-entfärne los gange, wills doch sehr warm gsi isch an dem Tag. Zum Glück isch de Wäg zur Ishalle aber jo nit wüchlich lang ☺. In de Curlinghalle acho, simmer zerscht mol in 2 Gruppe ufteilt worde wo das Ganze mol theoretisch und praktisch erklärt worde isch. Scho dört het me chöne ahne, dass es sehr e luschtige Nomitag wärde wird. Denn nit alli sin mitem Glattiis uf Ahib klar cho ☺. Nach de Ifüehrig und em Mittagässe simmer denn go mätchle. Und soooo schlächt ischs em einte oder andere gar nit gloffe. Me chönt sogar sage, es het e paar Talent gha unter de Schlösslis. Natürlich hets aber au die gha, was hän müesse übertribe mitem Wüschduell und denn nit mitem Stei – sondern miteme heftige Sturz ins Huus alli andere Stei abgruumt händ ☺. Mer nenne jetzt do keini Nämme, aber s'Publikum uf de Tribüne het definitiv Gfalle dra gfunde und het die Curlingspielende luthals unterstützt=D.

Nachdem mer denn vor de Curlinghalle no eine zum Beschte gäh händ, ischs mitem Trämli witter gange Richtig Stadt wo mer im Fuegefärgchäller gsi sind und dört no Spiis und Trank becho händ. Und denn ischs denn au scho bald los gange mitem Bummel durch d'Freie. Es isch e super Atmosphäre gsi und mer sind au als baselländler Gugge vo allne akzeptiert und gschätzt worde ☺. Nachdem mer denn no e chli durchd Strosse Richtig Träppe bi de Balz bummet sind, und mer dört no unsert obligate Ständli gspielt hän, isch de offizielli Bummel 2017 au scho wider verbi gsi. Es isch e super Tag gsi bi verhältnismässig sehr warme Temperature und mer freue uns jetzt scho wider ufs nägschti Jahr und sin gespannt uf das wo no chunt ☺.

Celine



## 9mol entweder oder mit... Celine « Silä » Rätz

Zoggeli oder Schueh?

Zoggeli

Schnipo oder Hörnli mit Ghacktem?

Hörnli

Konfetti oder Röppli?

Irgendwie beides :-)

Vorne im Car oder hinde im Car?

Vorne im Car—sunscht kippi wieder um :-D

Harlekin oder Waggis?

Waggis

„Wanderer“ oder „Elton“?

Keins vo beidem

Pub oder Schöppli-Bar?

Schöppli Bar

Alka Seltzer oder Bier gege s'Chopfweh?

Alka Seltzer

Kaffi Lutz oder Bleichüügeli?

Beides gruusig =) (wenn denn Fröschli)

# Uff e gueti Jubiläums Saison!

Leserbriefe, Inseratenbestellungen, Artikel,

Anregungen, Kritik, Lob etc. an:

[info@schloessli-schraenezer.ch](mailto:info@schloessli-schraenezer.ch)

Merci beschtens

Matti-Babbe-Fischi

[www.schloessli-schraenezer.ch](http://www.schloessli-schraenezer.ch)